


Corporaziun Alp Cristallina / S. Gions



Statutas

I. Determinaziuns generalas

Art. 1 Intent

Sin fundament dil regulativ d'agricultura dalla vischnaunca da Medel/Lucmagn vegn relaschau las suandontas statutas. Questas statutas vulan promover ils intents da guder, tgirar e mantener las alps.

Art. 2 Survigilanza

La survigilanza cumpeta als ugaus dallas alps ed al gerau d'agricultura ensemen cun il revisur da quen dallas alps. Il gerau d'agricultura fa part allas radunonzas dallas alps.

Art. 3 Administraziun

Il gerau d'agricultura ensemen cun il revisur da quen revedan tut ils quens dallas alps.

Art. 4 Ugaus

Gl'ugau vegn elegius dalla radunonza dallas alps e quei per temps nunlimitau.

Gl'ugau sco era ils ulteriurs officials d'alp san remetter lur uffeci mintgamai sin la fin digl onn. La visada sto vegnir inoltrada all'administraziun d'alp sil pli tard entochen la fin da schaner digl onn da demissiun.

Gl'ugau ei responsabels per gl'entir menaschi d'alp. L'invitaziun alla radunonza da rendaquen sto silmeins succeder 8 dis avon. Ella sa succeder persunalmein ni cun publicar el fegl official.

Il quen sa era vegnir menaus d'ina tiarza persuna.

II. Annunzia dils animals, cargada

Art. 5 Repartiziun dalla specia d'animals

L'Alp Cristallina / S. Gions vegn cargada cun vaccas-mumma.

Excepziuns drovan lubientscha digl ugau.

Art. 6 Utilisaziun dallas alps

Per l'alp vala in'alpegiaziun maximala da 78.78 N.S.T.

Art. 7 Annunzia

Il animals ston vegnir annunziats per l'alpegiaziun en scret agl'ugau entochen ils 15 da mars digl'onn current.

Art. 8 Aquens

Gl'ugau sa, tenor basegns, incassar suenter la cargada in aquen. L'altezia dalla summa stat libra agl'ugau da decider.

Art. 9 Pustretschs

Ils pustretschs ed ils aquens ein da pagar enteifer 30 dis. Per tuts pagamenti suenter quei termin vegn incassau in tscheins da retard tenor las normas cantunalas.

Art. 10 Ulivaziun dallas alps

Ein dapli animals annunziats che lubiu tenor art. 6, vegnan suandontas mesiras pridas per reducir il diember: Gl'ugau dall'alp ulivescha ils animals. Silsuenter lai el saver ils possessurs pertuccai nua ch'els han da cargar lur animals. En cass specials decidan gl'ugau ensemen cul gerau d'agricultura.

Art. 11 Gliesta d'animals

Sin il di dalla cargada sto mintga pur purtar il documents tenor prescripziuns dil cantun.

Art. 12 Cargar

Mintga pursanavel ei sez responsabels che ses animals vegnan en l'alp.

Tuts animals ston esser tier la cargada nudai cun ina numera ni cun las inizialas dil pur.

Cu cargar las alps decidan il gerau d'agricultura ensemen culs ugaus e cautebias dallas alps.

Art. 13 Cass da neiv

En cass da neiv ei mintga pursanavel obligaus da setener vid las ordinaziuns digl ugau. Quel decida sur d'ina eventuala scargada dall'alp.

Art. 14 Scargada

Animals che vegnan pri ord l'alp avon temps ston vegnir annunziar al pastur. Tier la scargada ei mintga pursanavel d'animals obligaus da controllar l'identitad da ses animals.

Mintga pursanavel ha la pusseivladad dad ira il di avon en l'alp per ses animals, sto denton s'annunziar tiel pastur.

Art. 15 Alpegiazion parziala

Animals che retilan subsidis d'alpegiazion pagan pustretsch.

Art. 16 Animals suenter temps

Il pastur ei obligaus da registrar mintg'animal che banduna e tuorna ell'alp, tut tenor prescripziuns dil cantun.

Art. 17 Animals malsauns

Gl'ugau sa examinar tier la cargada la sanadad dils animals (zoppadad, infecziuns digl iver eav.) ed eventualmein refusar els. Il possessur dils animals sto tractar els ni sa remplazzar els.

Animals malsauns che vegnan annunziar dil pastur ston vegnir tgirai immediatamein e sch'ei basegna ston els vegnir scargai. Cuosts da tractament e transport vegnan mess a quen al possessur dils animals.

Gl'ugau orientescha il pastur tgei ch'ei d'interpreter per animals blessai ni per tals ch'ei a frusta (survetsch da salvament).

Art. 18 Medicaments

Gl'ugau procura per in'apoteca adattada. Medicaments vegnan mess a quen al possessur.

Art. 19 Salvaments d'animals

Mintga pur sto esser faatur dalla Rega. Plinavon sto vegnir risguardau las prescripziuns dil cantun.

Art. 20 Prescripziuns cantunalas d'alpegiaziun

Ils ugaus procuran che las prescripziuns cantunalas d'alpegiaziun vegnan observadas.

Art. 21 Scamond da pasculaziun

La pasculaziun dil territori d'uaul ei scumandada. Il contract da servitut impurtaus el cudisch funsil dalla vischnaunca e las disposiziuns ella planisaziun forestala fixeschan ils detagls (art. 25 dil reglament forestal).

III. Lavur cumina

Art. 22 Intent

Gl'intent ei oravontut da schubergiar, tgirar, migliurar ed engarschar las pastiras communalas e las pastiras d'alp, sco era il manteniment dils passadis e dils buntadés.

Las uras da lavur cumina vegnan indemnizadas tenor il reglament da salarisaziun da vischnaunca.

Lavurs da manteniment san vegnir annunziadas alla vischnaunca tenor art. 24 dil reglament d'agricultura. Per saver far diever dil conto da manteniment communal sto gl'ugau presentar ina calculaziun detagliada dils cuosts al gerau d'agricultura ed al revisur da quen.

L'indemnisiun succeda suenter l'investa dallas lavurs ed il consentiment dil gerau d'agricultura e dil revisur dallas alps.

Art. 23 Uras cun maschinas

Las uras cun maschinas vegnan indemnizadas tenor la tariffa dalla FAT.

Art. 24 Organisaziun controlla

Gl'ugau ni ina persuna engaschada specialmein per quei intent survigilescha la lavur cumina e meina cudisch sur dallas uras prestadas. El reparta las lavurs e

controllescha ellas. Ei vegn mo reconuschiu las uras e las lavurs che vegnan ordinadas digl ugau.

Art. 25 Persunas

Lavurs da giuvenils denter 12 e 15 onns quantan mo sco mesa prestaziun.

Art. 26 Viadis

Ils viadis en l'alp ed anavos cun auto quantan buca sco temps da lavur. Viadis a pei sin vias buca carrablas valan sco temps da lavur.

Art. 27 Leschas surordinadas

Cun la pasculaziun e la tgira dallas pastiras eis ei da risguardar las leschas surordinadas sco las leschas per la protecziun dallas auas, per il schurmetg dallas palius ni las disposiziuns executivas dallas contribuziuns dall'alpegiaziun. Las seivs construidas per da quels intents ein da survegilar da quels che fan diever dalla seiv.

IV. Pertgirar ora las alps

Art. 28 Alp Cristallina / S. Gions

L'Alp Cristallina / S. Gions vegn pertgirada ora naven dalla punt da S. Gagl anenasi naven dall'entschatta dil temps da mises. La seiv vegn construida dall'alp, denton survegilada e mantenida da quels che fan diever dalla seiv. Pigl atun lai l'Alp Cristallina / S. Gions anavos la Pardiala sur via cantunala ed il Plaun-grond a Pardatsch.

Art. 29 En general

En cass che la situaziun en in mises ni l'auter semidass dil tuttafatg pertuccont quantum da tiers, eis ei pusseivel da far midadas dil suranumnau art. 28, mintgamai sin la radunonza da rendaquen da mintg'alp.

V. Indemnisaziuns per funcziunaris

Art. 30 Indemnisaziuns

La paga fixa munta a frs. 300.-- e cuntegn las suandontas lavurs:

- pladir la fumeiglia cun:
 - > far in contract a scret
 - > annunziar alla cassa da malsauns
 - > annunziar alla SVA
- organisar la lavur cumina
- annunziar TVD
- annunziar per subsidis d'alpegiaziun

La lavur per menar il quen vegn indemnizada cun frs. 1'000.--.

VI. Determinaziuns finalas

Art. 31 Camp d'applicaziun

Questas statutas completeschan il reglament d'agricultura dalla vischnaunca da Medel/Lucmagn che vala sco lescha surordinaria.

Art. 32 Midadas

Propostas per midadas da quest reglament ston vegnir inoltradas a scret al gerau d'agricultura ni agl ugau dall'alp.

Art. 33 Dretg da recuors

Encunter conclus dalla corporaziun sa vegnir recurriu enteifer 20 dis tier la suprastonza communal.

Art. 34 Vigur

Quellas statutas ein vegnidas approbadas dalla radunonza da rendaquen dalla corporaziun dils 30-03-2011 e dalla suprastonza communal a caschun dalla seduta dils 26-05-2011.

Cun la vigur da questas statutas ein tuts anteriurs reglaments per l'Alp Cristallina / S. Gions dalla vischnaunca da Medel/Lucmagn cassai.

Alp Cristallina / S. Gions
Gl'ugau

Bernard Lutz

Suprastonza communal
Vischnaunca Medel

Il president:

Igl actuar:

Peter Binz

Valentin Pally